

INFRASCADA DE 'L CORPUS DOMINI

Al sabo prima, verso sera, sonava 'l campanò. La domenega matina rivava i cavali co gran cari de rame co 'l so verde pa rivestire li archi de porteghi e tore. Da la ciesa, da 'na tore e 'st'altra, do ròste de rame de amolaro co li so fruti crui che noialtri boce stacavimo pa farse la guera. Verso sera, gran procession... e tuti i toseti co sesteli a spandar fiori. Dopo xè stà invià 'na gran infiorata.

'ndar al Santo

De santi ghi n'è me no so quanti, ma uno solo xè 'l Santo, Antonio. Co se jèra tuti poareti la devossion jèra tanta. Da 'a canpagna se costumava 'ndare a piè a basare la relichia, partindo a 'e quatro par ciaparse on posto 'par 'a Messa Granda, senpre a digiuno par 'a comunion. Fenio messa, tuti in Prà de la Vale par 'a marena portà so la sporta: salado, formagela, sardele in savor, pan biscoto e on fiasco de vin. Dopo, pianeto, introsarse verso casa a piè descalsi par via de le vessighe.

Padre Adino Roncato nato a Noale, al Bigolo, al 21 de febraro del 44, soto le bonbe molale so 'a Vasugana, core fora dal rifugio parchè no jèra rivà 'na sposa. La trova a metà strada, posada a on pajaro drio partorire. 'l ghe juta, nasso mi, 'l me batiza col so nome parchè, so quel giazio, dovea morire. More invece lu 10 ani dopo, in Giapon, so on incendio al so orfanatrofio, portando fora l'ultimo invalido. 'l presidente Einaudi ghe dà la medaja d'oro al valore e Noale ghe intitola 'na strada.

A mare de San Piero

Se sa che la mare de San Piero sta fora oto dì par da vero e che la so piova fa brentana par oto dì o 'na setimana! Parcossa? La jèra tanto rabiosa che nissun xè sta bon domarla, gnanca 'l damonio ghe tigne a testa. San Piero, ('a jèra so mare), col parmesso de nostro Signore, poteva tirarla in paradiso solo che la gavesse fato 'na scianta de ben: 'a gavea dà 'na foja de salata a on poareto. Co quella foja 'l provava tirarla su. A i piè de la vecia se gavea tacà do altre aneme, ma ela, rabiosa, 'a se gà sachetà pa destacarle, 'a foja se gà roto, cussì 'a xè ancora in giro a far malani.